

- Tho fúar er thuruh snörga mit imo hohe bérge:
 thar óugta in ánalíhi imo ellu uuóroltríchi,
 E'ra ioh thiú ríchi inti manag gúallichi,
 theiz uuári mo gizámi int imo in múat quámi.
 85 'Thiz lázu ih', quad, 'zi hénti zi thineru giunélti,
 in thiú thu nitharfalles ioh mih béton uuolles.' —
 Er spénit unsib álle zi míhilemo fálle
 in uuórton ioh in uuérkon: thaz múazin uuir biuuánkon.
 Then sálidon sie intfállent, thie inan béton uuóllent,
 90 ioh thúltent sie in éuon then mánagfaltan unéuuon. —
 Tho gab er imo ántuuurti, thoh uuírdig er es ni uuárti,
 ioh dét er thaz hiar ófto filu mézhafto:
 'Far hina, uuídaruuerto! ni ruah ih thero uuórto;
 in búachon ist irdéilit ioh álles uui. giméinit:
 95 Thar íst gibotan háрто sélben gotes uuórto,
 thaz mán imo io gilícho thiono fórahtlicho;
 Man óuh bidráhtoti, er ánderan ni bétoti,
 in uuórolti nihéinan, ni sí selbon drúhtin einan'.
 Fuar ther díufal thana sár; tho uuarun éngila thár:
 100 ni brást iro iouuánne imo zi thiononne.
 Ther díufal sin ni kórati, furi mán er nan ni hábeti;
 thie éngila quámun thuruh tház, uuant er drúhtin iro uuás. —
 E'llu thisu rédina uuir hiar nu scribun óbana,
 thaz inan ther uuídaruuerto gruázta thero uuórto:
 105 Ni quám iz in sin múat in uuar (thaz ni mohba uuésan sar),
 ódo óuh thes hérzen guati uuíht innana birúarti.
 Ni móht er nan birúaren, noh uuérgin óuh gifúaren:
 óuh sélbun theso férti ni vuúrtin, er ni uuólti.

19. V. Spiritualiter.

- Vuir scúlun uns zi gúate nu kéren thaz zi múate,
 mit uuiu ther díufal so frám, bisuéih then ériston man.
 Vuir sculun dráhton bi tház, thaz uuir giuuárten uns thiú báz,
 ioh uuir iz giuuárilícho bimíden io gilícho.
 5 A'daman then alton bisuéih er mit then uuórton:
 ther iungo ioh ther gúato giréh inan gimúato.
 Spúan er io zi nóti iénan zi úbarnuati,
 zi giri ioh zi rúame, zi suaremo ríchiduame.
 Níazan sáh er inan tház, thaz imo iu gísuás uuas;
 10 tho irbónth er imo io thés sindes thes skonen héiminges.
 Fiang er thó, so er then giuuan, mit thiú zi demo ándremo man:
 er bifánd, theiz uuas niuuíht, ni záueta imo es níauuíht.
 Er uuolta in thémo ana uuánk duan so sámalichan skránk.
 génan so bifált er: hiar uuárd er filu scánter.
 15 Themo álten det er súazi, thaz er thaz óbaz azi,
 gispuan, thaz ér óuh thaz firliáz, thaz drúhtin inan dúan hiaz.
 Gilíh, quad, góton uuarin, in thiú sie iz ni firbárin,
 quad gúat ioh úbil uuessin, thes gúates thoh ni míssin.